

# Jonr

## dwandfamo barkof gontwat

### Barkof kfo nuhas mrokfot

Jonr ndar barkof gontwat wandfamohat, hus bro dukefetrn ndar gontwat wandfamort. Duka memor, “Gontwaye Kristenm bi kfo dukarhotanm Bro Nkifra nitohfpno nayakitohruhamn rpat tohrahm.” Yo nhai wofnrmor kspitat tohyuk yimam yihato Kristenm mfrnheh bonhehakhato rom Bro Nkifrar frtrohneft.

Nd kspitat tohwa yimam kfo kangm, “Bbinysoft dborhayuk wuskar yo yimam nhai tu dboriohm rhukahm. Tu faso mif korhm. Bro Nkifrarhu yon Jisar ndar bbinysoft adborhar nhai dboriohr rhurfotr. Yima mifm kanjo inji faso rhurfor.” Yo kfo kangm, “Bro Nkifrar nhai ndar bbinysoft nom tohhato niwa nefm htihato kfo ptha inji nakahr. Nhai. Kukatoh marsisa hasiurnom. Ndnnetnomn nom tamoh neft to frohm kforuhamnom, be nafura bofurakfot. Dborioh nefm o fasoh nefm be nafura bofurakfot. Bro Nkifrar nhai ptha inji nakahrm nom niwa nefm. Ndnnetnomn tamoh nefm be tunmoh fijo nafura bofurakfot.”

Jonr duka memor, “Ndhtet kfet yimam Kristenm wany yakio duha.” Kfo memor, “Jisar tu yima mif mifr tohmr. Fitoh yimaroh yima yuhum kfo kangm, Jisar tu yima mif mifr tohmr yo Bro Nkifrar rpat kakitohwomr, nd yimam womm yak marnyakfot.”

---

### Mirahko yifungt ritohwa yimaroh nefm ahiknom. Bro Nkifrarhu nukeft wiyauyaukfot.

*(Sapta 1.1–3.10)*

### Bro Nkifrarhu mrokfot yafothetet

**1** <sup>1</sup>Nda gontwat na wandfiwat wom mrokfot kfo nuhasruhanko. Nd mrokfot tu yafothet mrokfot kfo nuhasruhanko. Ndar bbinysoft tafi trha duha nd mrokfot bi ritohngotakmot. Nom bi riwanyakmonomt

nd mrokfot. Yo tunmoh nyingaye htimonomt. Yo tunmoh tire faktiwonmonomt.

<sup>2</sup>Nd yafothet mrokfot yarim fnahmott htimonomt. Nom nd mrokfot htihato kfo nuhaswonomko. Nd rhu nkifrayet mrokfot bingotn bi Bro Yifemrpno rhumout.

<sup>3</sup>Nom htihato wanyuk mro-kfom kangnom akfo nuhaskahtnomko, niko wanyhato nom tohwa toh yuhat rpat tohrahnom. Rpat tohhato nom Bro Nkifrari rorhu yon Jisas Krairpno tohwa tohefrpat toh bugarahnom.

<sup>4</sup>Nom kangnom, gontwaye akfo nuhaskahtnomko niko wanyhato be bro yindhorefrparpno rhurahnom.

### Bro Nkifrarhu nukeft wiyauyaukfot

<sup>5</sup>Jisas Krair pthayuk mrokfom nom wanyhato kfo ptha nuhaswam inji kfiwum, “Bro Nkifrar nhai wom tefi kspitefenrpno rhukahr. Nhai. Ror bro mar nukefrparpno korhr.”

<sup>6</sup>Wom yimar kfo kangr, “Na Bro Nkifrar hifa hifa tohwa. Nhai na wom nefm nakaha.” Inji kfet yimar wiyauyau marnyakfot. To tfit rorhu wiyauyau nmbuhat nndo nndo rinewunineft, nd yimar be tngrrpatn kfo furewur. Nhai Bro Nkifrar hikkahr.

<sup>7</sup>Nom Bro Nkifrarhu mar nukeft tohhato rorhu dborioh nefrpam hikneft, tu Bro Nkifrar dborioh nefm niwa kanjo nom wom Kristenmpno be rpat toh marnya-hato nhai wom beb nmbuham rhu-ruhatmnom. Rpat tohruhanomn rorhu yon Jisas Krairhu kkupaye nmoh fasoh fasoh nefm yak wus bowuswatrm nmoh yima yuhum wutham rhurahm.

<sup>8</sup>Nom be tunmoh rhu nmbuharpam hti yukatohhato kfo mirahnom, “Nom nhai wom fasoh nefenm rhukahmnom.” Mrokfot inji kfoneft be tunmoh nefm kak wunewunom. Nhai tu kfo mifkfot kfokahnom.

<sup>9</sup>Nd nom nahnayuk fasoh fasoh nefm Bro Nkifrar pno yihato kfo ptha nriyafrahnom, nhai wanyhato rhu mongruhatrnom. Tur kfomo yuhatn nd fasoh nefm yak wus bowus thurahrm. Yak wus bowus thuhato duka mumaforahrm nmoh fasoh nefm.

<sup>10</sup>To tfit nom kfo manyeft, “Nom nhai wom fasoh nefenm nakahnom.” Inji kfonefte ka Bro Nkifrar kfo furamor ror dkfo memohat, “Yima bugam fasoh nef bugayetem?” Nd mrokfot ka kfo furamot. Niko ka nhai mdukakkahnom ror bi kfoyuk mrokfom?

### Krair nmoh toh taro yimayer

**2** <sup>1</sup>Bar yinouroko, nann ndar gontwat wandfiwanko. Kanga akfo hta nuhasanko. Mirahko fasoh fasoh nefm ananom. Be toh hanyhato wom fasoh nefm mnent, tor nmoh wom toh taro yimar. Tor Bro Yifemrpno tohwor. Nd yimar Jisas Kraiser. Tu dborioh yima mifer. Nom niwa fasoh fasoh nefm tfit rorn Bro Nkifrar pno ruhato kfo kangrr, “Nd

yimaroh nefm nann bi suh nanyormoyanm. Mirahn tfit adukahiyannm.” Rorn nd mrokfom kak hta bohta marnyewurm.

<sup>2</sup>Rorn nmoh ufasoh nefmpno nohmor. To niko mirahko ka be nmoh nefrpanm nohmorm, nhai mif. Nda dodh bbinysof bugathu met yindari bugaroh nefm noh bugamorm.

**Yimar Bro Nkifrarano brbo frtkafetr, nd yimar kak hikwort tu Bro Nkifrarhu thfa mntwathu mrokfot**

<sup>3</sup>Bro Nkifrarhu thfa mntwathu hikneftano, Bro Nkifrar hti duka tawisafwonmr.

<sup>4</sup>Wom yimar kfo kangr, “Na bi Bro Nkifrar tawisafwanr.” Tfit rorhu wiyau yau toh nmbuhat nhai Bro Nkifrarhu thfa mntwat kfiwa mrokfo yuhath hik marnyakahrt, nd yimar be tngrrpatn furewur. Nhai tu kfo mif mifkahr.

<sup>5-6</sup>Yimar Bro Nkifrarhu mrokfom hiketr, Bro Nkifrar rorhu yima yuhur korhr. Yimar kfo kangr, “Na Bro Nkifrarhu mrokfom kak hikwa.” Inji kfet yimar tu Jisas Krairhu wura tfi yuhatn yau hikkfot. Jisasrhu wura tfi yuhath yau hikhato nom htiruhanomn kfo mirahnom, awi, Bro Nkifrarhu toheft toh hikwor.

<sup>7</sup>Bar yinouroko, nd yima nayak marnyanefthu mrokfot na wandfiwat, mirahko ka nfri mrokfoyet. Nhai. Nda mrokfot bi niko Kristenko riwanyakmo mrokfoyet.

<sup>8</sup>To nda mrokfot tu mna yimbu yuhettn, ndnatn nfri mrokfot kanjo wandfiwanko. Nda mrokfot bingot tu yafothett rhumot. Krair nd mrokfot hikhato bro hingrneft hinger-namor. Yo niko nd mrokfot wanyhato yifung kspitathu ufasoh nefm htany-hato Brorhu nuketfn wiyauyauwoko.

<sup>9</sup>Wom yimar kfo kangr, “Na Bro Nkifrarhu mar nukefrn tohwa.” Inji kfet yimar tfit wom Kristenm hti srthuworm, nd yimar nhai mar nukefr tohkahr. Yuhre kspitat tohwor.

<sup>10</sup>Yimar wom Kristen yimampno nayak marnyahato rpat tohwar, tor nd yimarn Bro Nkifrarhu mar nuketfn tohwor. Mar nuketf tohyuk yimar nhai suhkahr.

<sup>11</sup>Yimar wom Kristen yimam hti sretr, nd yimar afo yifung kspthu nefm tohwor. Yiro yifung kspt tohwarn nyinga kunyjetm kanjo tur yiyuk yihotat nhai hti dbtakuhahrt.

<sup>12</sup>O niko, nanhu yonenko, Bro Nkifrarhu Krair nohmo nmbuhat mhtiyakhato nikmoh fasoh nefm bi fak wus bowus thumorm. Ndnnetann gontwatn wandfahato kfo nuhas-wanko.

<sup>13</sup>Niko bro yimako bi kriyany hmbreyetko, niko bi htimokomr, nd bi ritohngotakmo yimar. Ndar gontwat nikmoh yufampno rpat niewut.

Yo niko damiag yimako, Bro Nkifrarhu bbuka rifhur hatohhato Satanr yahot tkaftahato toh bmtewako, niko inji buga gontwat nikmoh yufampno niewut.

<sup>14</sup>Nanhu yonenko, bi Bro Yifemr-pno frtkafetko, nikompno ndar gontwat wandfiwanko.

Niko bro yimako bi kriyany hmbreyetko, niko bi htimokomr, nd bi ritohngotakmo yimar. Ndar gontwat nikmoh yufampno rpat niewut.

O damiag yimako, niko toh bnte-wakomn Bro Nkifrarhu mrokfot yakitohhato nd mrokfotn kak hta bohtewutm nikmoh wiyauyau nmbu-ham. Ror toh tkafwatrko Satanr bi fahot tkafmokomr. Ndnetann ndar gontwat wandfiwanko.

### **Bbinysofthu fasoh nefm yima yuhum sinya duha**

<sup>15</sup>Ndnetann kfiwanko mirahko ndar bbinysofti rot haruhwa fasoh fasoh nefm ahti yuhurkahnomn nd fasoh nefm arim tohniinom. Ndar bbinysofthu fasoh nefm rim toh-nirahko, to be nhai tfit kekutakhato tfit Bro Yifemr-pno nieruhatko. Nhai.

<sup>16</sup>To mirahko ka tamoh nefm kfiwur-nom rim tohneft. To nd nyingaye htihato tfit yima yuhu sinyewohat yo thatipm mwofnita nefm newohat ee tamoh tamoh nefmpno o wuskampno yufam kfo hagrha bohagriwa nefm, nd nefm nhai Bro Yifemr-pno niakahm. Nhai. Nd nefm be nda bbinysoftuhem.

<sup>17</sup>Nda bbinysoft mibatiniraht. Yo nda bbinysoft yorhwa fasoh nefm yimam mhti wofnihato niwam, ndm rpat mibati buganirahm. Yimam tu Bro Nkifrarhu dukef yuhatn toh hikwam, romn toh nkifranirahm.

### **Kraisrhu hti dbnotyuk yimam bi htitkomm**

<sup>18</sup>Nanhu yonenko, niko wany hnamo mrokfot kfo memot, bbiny-softhu mibatini yihar Kraisrhu hti dbnotyuk yimar, kutewumr Anti Kraistr, nierahr. Arihar bi htitko bok yimam Kraisrhu hti dbnotyukm bi mfnah hanitm. Ndnatn nom duka kangnom nda bbinysofthu mibatini yihar bi brbohwor.

<sup>19</sup>Nd Kraistr hti dbnotwa yimam afo nompno rpat toh hnamounom. To tfit arihatn bi frfnah-wom. Rom nompno toh hnamohat nhai tu Kraisrhu yima yuhurn toh hnarmom. Tu Kraisrhu yima yuhurn atoh hnam, nhai inji frfnahmotm. Bi frfnahmotm, ndt htihato kangnom, Kraistr-pno be inji toh tariowakmoum. Nhai tu yarim fnahna bugarmom.

<sup>20</sup>To nikom nhai nd Kraistr hti dbnotet yimam kanjo tohkahko. Nhai. Kraistrn Bro Nkifrarhu Yafothar yak-hato yiro yima yuhum htewurko. Nd Yafotharn thu nawohwatrko dborioh yima yuhur niawatr Bro Nkifrarhu tu mrokfom duka dbtak hik bohikwo-komm.

<sup>21</sup>Ndar gontwat nikompno wandfiwa nmbuhat mirahko ka Bro Nkifrarhu mrokfot yak mumiwatkomt na wandfiwanko. Nhai. Niko Bro Nkifrarhu mrokfot bi hti hik bohikwo-komt. Hti hikhato kfo kangko, “Nd Bro Nkifrarhu mrokfot tu kfo mif kfoyet.” Nd nmbuhatpno na wandfiwanko.

<sup>22</sup>Yimam kfo furayetm to frohem? To nd yimam kfo yamukam, mirahko amanyom Jisars ka nmoh hbhakyuk yima Kraiser. Nhai. Tom inji kfet yimamn Bro Yifemri rorhu Yonr mong trohhato hti dbnotwomf.

<sup>23</sup>Yimar Yinemr frtrohwor, to be Yifemrn frtrohwor. Yimar Yinemr frtkafwor, to be Yifemrn frtkafwor.

**Kraisrhu tu kfo mif mrokfom Bro Nkifrarhu  
Yafothar kak nuhas bonuhaswornom**

<sup>24</sup>Nd bingot niko Kristenko ritohak-hato riwanyakmo mrokfot, ndtn wayakitoh kih hanyswako. Yakitoh hanyrahkomt, be Bro Yifem nitohfpno rpat frtkafhato tohrakho.

<sup>25</sup>Bingot Kraistr bi kfo hta memornom, “Dborioh rhu nmbuhat hiruhanko. Hirhotanko be nd dborioh rhu nmbuhatn rhu nkifranirahko.”

<sup>26</sup>Yimam yi mfrnhehwatmko, ndnetann nda kfo duka mrokfot wandfiwanko.

<sup>27</sup>To tfit wom dukefr duka kanga, bi Kraistr Bro Nkifrarhu Yafothat thu hmbremotrm bi nd Yafothatn rroh toh nmbuham kak hta bohtaf hanittm. Ndnnett nhai wom yimam yihato mfrnhehruhatmko. Bro Nkifrarhu Yafotharpatn kak nuhas bonuhas marnyewutko tamoh tamohm. Nd Yafothat kfoyuk mrokfom tu kfo mif mrokfom kfiwutko. Niko mirahko ka kfo fura kfoyem. Ndnnett niko nd Bro Nkifrarhu Yafothat kfoyuk tng yuham yak hikhato Kraistrpno brbo frtkafkfo.

**Arihat bi Bro Nkifrarhu yonenom**

<sup>28</sup>Yo nanhu yonenko, nikom Kraistrpno brbo mfrtkafkfo. Inji naneft rorhu fnahnayuk yihar nom nhai yimtnakhato tpikr yihom nahmbri-ruhatnom. Nhai. Nom be bro yindho-rpampno tafont tohhato htihakrahnomr. Nhai yimtnayefmpno toh htihak-ruhatnomr.

<sup>29</sup>Nikom htiketeko Kraistr tu dborioh yima mifer. Ndnatn nikom htikfot fitoh yimar dborioh nefm newurm, nd yimar Bro Nkifrarhu yoner.

**3** <sup>1</sup>Dajohmn, Bro Yifemr nom be tu mondt n hta mifhato kutewur-nom rorhu yonnom. Rorhu yonnom yorhwatno tfit nd Bro Nkifrar hik duha yimam hti mumiwumnom.

<sup>2</sup>Barenko, nom bi Bro Nkifrarhu yonnom korhnom. To kto Kraistr tafont yarim fnahna thombat nom ka finji frdborha rmonruhanom? Ror yarim fnahna thombat nom tunmoh nyingaye htihakrahnomr. Ndnnett nom turhu ruheft kanjo frdborha rmon bugarah-nom.

<sup>3</sup>Yimam Kraistr yukatoh darwon hasiwam, nd yimaroh yima yuhum yak marnya bomarnyahato wutham korhm tu Kraistr kanjo.

<sup>4</sup>Yimar fasoh nefm nayetr, ndr Bro Nkifrarhu boririfhut hanyjbornet yimayer. Fasoh nefm naneft to Bro Nkifrarhu mrokfothu hanyjbornanefet.

<sup>5</sup>Bi wany hnamokomt Kraistr yawih-nehato nohmo yuhat. Ror yawihnehato nohmohat to nmoh fasoh nefm minoh nhehafomor. Ror tur nhai wom fasoh nefm nahato nohrmor. Be mgogra yimar noh furamor.

<sup>6</sup>Yimar Kraistrpno brbo mfrtkafwar, nd yimar mong troh bugewurm fasoh nefm. Yimar fasoh nefm rim tohak rim tohak na hanitar, nd yimar nhai Kraistrhu yihotar hti dbtakukahrr.

<sup>7</sup>Yo! Nanhu yonenko, ndnettn niko duka marnyakfot. Wom yimam nieruhamn mfrnhehakhato fasoh yihota bebr hanyrahmko. Yimar dborioh yihotar yauwar, nd yimar Kraistr kanjo yauwarn rorhu yima yuhur wuthar korhrr.

<sup>8</sup>Bingotn nda bbinysoft trhamo yiharpno Satanr fasoh nefm rinakhato na hnamorm. Ndnettn fasoh nefm na hnamo yimam to be Satanrhu yinhitn toh hnamom. Bro Nkifrarhu yon Jisas Kraistr inji hti tanyhato yawihnamorn nd Satanrhu fasoh hingrneft fak dbhurakmort.

<sup>9</sup>Fitoh yimam bi Bro Nkifrarhu yonm korhm, nd yimam nhai wom fasoh nefm wanathu wanathunakahmm. Bro Nkifrarhu toheft romn fakmomt. Ndnettn nhai Satanrhu nefm yakitoh hanykahm.

<sup>10</sup>Finji hti nhtahato kfo miruhanom, ndr Bro Nkifrarhu yoner, ndrne Satanrhu yoner? Wanukko. Inji htikfot, fitoh yimar nhai dborioh nefm nakahr yo Bro Nkifrar hikwa yimam nhai yak marnyakahrm, tor nd yimarn nhai Bro Nkifrarhu yonr rhukahr.

### **Rpa rpa yimanom wommpno nayak marnyakfot**

*(Sapta 3.11–5.21)*

#### **Jisasr fak nuhasmornom wommpno nayak marnyanefit**

<sup>11</sup>Bingot riruhakmo mrokfot wany hnamokomt, inji kfomot: Nom wom Kristen yimampno tohneft, nom be nayak marnyahato rpa yima yuhur rhukfot.

<sup>12</sup>Nom Kenr namo nmbuhat yak duha. Ror Satanrhu yimarn turhu nmem Aberr frdbofna furamorr. To tamohmpno inji frdbofnamorr? Kenr nhai wom dborioh neft narmoar. Tfit htimour wom nmemrhu nefm hifa hifa nmbuham namour, ndnetrn frdbofna furamorr.

<sup>13</sup>Niko, nmoh Kristen yimatko, nda bbinysof thofm hti srwomko. Mirahko ndte ka arnhofrhof nefet.

<sup>14</sup>Nom wom Kristen yimatmpno nayak marnyahato rpat tohwohat, nom nd hel yita yihotar yau htafhato tfit nd toh yifahtaniruha kmiko yita yihotar tohwanomn nd nefm newu-nomm. Afo nd hel yita yihotar yuhre atohnom nhai ndhtet nefm narfotnomm.

<sup>15</sup>Mirahko nikmoh yimatm be ahti srthunomm. Womm inji rihti srtuhak-hato wom bro shrm miyakniruhakomn yak nadborrahkomm. Yimar yima wasetr nhai toh yifahtakahr.

<sup>16</sup>Jisas Kraistr nom dukahato nohmor. To nom womm dukahato nohneft to bi Jisas Kraistr fak nuhasmornom. Nom to nd yuhatn hikhato wom Kristen yimatm dukahato nohneft, hifa.

<sup>17</sup>Bro Nkifrar yima hti yuhuwafter. Ndnettn wom yimar bok wuskam harhuhato nhai wom wuskapa duha Kristen yimatm hti dukakahrm, nd yimar nhai Bro Nkifrarhu yima hti yuhuwafter yakitohkahrt.

<sup>18</sup> Arenko, mirahko wom Kristen yimatmpno be tngrpaye akfo yindhor boyindhor furanomm. Ndt nhai dborioh neft. Tamohm yakhihato kfo yindhorneft, hifa.

#### **Bro Nkifrarhu nyingahato toh bmtakfot**

<sup>19-20</sup> Tamoh neft naruhanomn tu nom hti duka miruhanom, Bro Nkifrarhu tu mrokfo mift hikwonomt? Tuko wahtitwako. Womm hti yuhu-wafhato tamohm fahukomm o hinger-nanuhikomm o tamoh tamohm finji nanuhikomm, nd nefmn htihato wamitwako, “Awi, Bro Nkifrarhu mrokfo mift hikwonomt.” Bro Nkifrar hik hanyhato wom yima yuhur kfo kangrn, “Ni Bro Nkifrar nhai hik marnyakahr.” Nd dukefr mfnahwor, mirahko nd dukefr ahtinom. Bro Nkifrarhu dukefr nhai yima mifnmohr kanjo rhukahr. Nom yorhwa ruheft Bro Nkifrar hti bugewurt. Ror tu yima yuhuwafeter. Be nhowi rhuhato rorpar yukatohaf hanykfot.

<sup>21</sup> Barenko, yima yuhum duka kangm, nom hifa Bro Nkifrarhu mrokfom hikwonomm. Yima yuhum inji kfiwumnom, to be hifa. Tamohm Bro Nkifrapno kfo ttiwonneft nhai duka kinyaki hany-ruhatnom.

<sup>22</sup> Yima yuhum inji rhuhato Bro Nkifrar tamohm kfo ttiwonwonmr, awi, kahukrnom. Rorhu mrokfom hikhato ror hti yindhorwa nefm hikwatnom, ndnetrn nom tamohm kfo ttiwonneft kahukrnom.

<sup>23</sup> Bro Nkifrar kfo kangr, “Nanhu yon Jisas Kraistrn yakitohhato wom Kristen yimatmpno nayak marnyahato rpat toh marnya-kfot.”

<sup>24</sup> Wom yimar Bro Nkifrarhu mrokfom yakitohhato hikworm, Bro Nkifrapno frtkafwor, tfit Bro Nkifrar tawo rorpno frtkafwor. Bro Nkifrar turhu Yafothat yahuka nmbuhat htihato kfo kangnom, “Bro Nkifrar nompno brbo frtkafwor.”

#### **Yimam yafotham fknihato kfo pthiwa mrokfom afo wany nhtakfot. Fitoh yafothar fknitarr pthiwar?**

**4** <sup>1</sup> Barenko, bok giman profetm nda bbinysoft wuyauyauwom. Ndnatn yimam niahato kfo kangmko, “Bro Nkifrarhu Yafothar mrokfom yahukatrnom kfo ptha nuhaswo-nomko.” Inji mkfoyuk yimam niko bi mirahko rroh mrokfom awany yakio-wakninomm. Nhai. Afo rhuhato wany nhtakfot. Fitoh yafothar fknihato mrokfom kfo pthiwarm? Bro Nkifrarhu Yafothar fknitrr pthewurr o nhai?

<sup>2</sup> Yimam Bro Nkifrarhu Yafothar fknihato kfo ptha thoft wanyrahnm kfo mirahm, “Jisas Kraistr nda bbinysoft niahato yima mifm kanjo tohmo.” Tom ndhtet kfet yimamn tu Bro Nkifrarhu Yafothar fknitarrm kfo pthewum.

<sup>3</sup> Yimam nhai inji kfo pthakahm, nd yimam wom fasoh yafotham fknitarrm pthewum. Nd yafotham Kraistrpno nahti dbnotwa yafothayem. Bi nd niko wanyaf memo yafotha bebm nierahm, to nd yafothamn bi niewum.

<sup>4</sup>Nanhu yonenko, niko Bro Nkifrarhu Yafothat hatohwoko. Nd Yafothat niko hatohwat tu bro bbuke-fetet. Nd Yafothat kahot tkafwotr Satanr. Nd Yafothathu bbuka rifhurpno kahot tkafwokomm nd giaman profetm.

<sup>5</sup>Nd yimam ndar bbinysoftuhem. Ndnatn rom pthewa mrokfom be nda bbinysofthu mrokfom kfo pthewum. Yimam nda bbinysofthu ufasoh nefm hikwam romn nd yimaroh mrokfom wany yakiowahukmm.

<sup>6</sup>Yimar tu Bro Nkifrarpmo frtkafetr, nd yimar womm pthayuk mrokfom wany nhtewurm. Mrokfom wany nhtahato kfo kangr, “Ndm tu yafothet mrokfom, ndm yafotha duhatem.” Nom bi Bro Nkifra-ruhenom. Yimam Bro Nkifrarpmo frtkafetm nom pthayuk mrokfom yudbat kekwoomm. Bro Nkifrarpmo frtkaf duha yimam nhai yudbat yakkahmm.

**Yimar Bro Nkifrarhu dukefrpmo tohwor,  
wommpno nayak marnyahato tohkfot**

<sup>7</sup>Arenko, nom wom Kristen yimatpmo nayak marnyahato rpat tohkfot. Nd wommpno nayak marnya-hato rpat tohneft, ndt Bro Nkifrarpmo rihtakmort. Fitoh yimar womm kak marnya bomarnyewurm, nd yimar Bro Nkifrarhu yon mifer. Bro Nkifrar rorn kukatohwor.

<sup>8</sup>Nd wom Kristen yimatpmo nayak marnyahato rpat tohneft, ndt Bro Nkifrar mhatoh fnahmo nefet. Nd yuhatn fitoh yimar womm nhai yak marnyahato hifa yima yuhur hmbrekahrm, nd yimar nhai Bro Nkifrar hti tawisafkahrr.

<sup>9</sup>Bro Nkifrarhu dukefr nomn rhumor. Nd dukefetrn nd ror hatohmo rpa yon mifr tkrurafmotrr nda bbinysoft fawihnamor. Nmoh fasoh nefm rorn suh nanyormorm. Suh nanyormotrm to be nmoh tohefti Bro Nkifrarhu toheft bi nhai wom mrokfom rhukahm-nom. To be rorpno toh nkifranirah-nom.

<sup>10</sup>Wommpno nahti dukahato nayak marnyanefn, ndt Bro Nkifrarhu nefet. To mirahko ka nomn hti duka gngonmonomr Bro Nkifrar. Nhai. Bro Nkifrarpmo hti duka gngonmornom. Nd dukefetrn turhu yonr kfo tkrurafmotrr nda bbinysoft niahato nmoh fasoh nefm rorn suh nanyormorm.

<sup>11</sup>Barenko, Bro Nkifrar turhu yonr hemo nmbuhat, ndt rorhu bro dukeft nompmo rhumo yuhatn fak nuhasmor-nom. Ndnatn nom Bro Nkifrarhu hikneft womm htihato yak marnya-kfot.

<sup>12</sup>Nhai wom yimar htiwonkahrr Bro Nkifrar. Be nd yimam htihato yak marnyanefn, ee nd tkittn Bro Nkifrar nompmo tohwor. Nompno tohhatu nd wommpno nayak marnyahato rpat tohneft rhu yakitoh hanyrahtnom.

<sup>13</sup>Bro Nkifrarhu Yafothat nompmo yorhwatt, nom ndt htihato kfo kang-nom, “Bro Nkifrar nompmo tohwor yo nom Bro Nkifrarpmo tohwonom.”

<sup>14</sup>Nd Yonr bbinysof thofroh nrfa htiyakyukr Bro Yifemr kfo tkrurafmor. Nom tunmoh nyingaye hti hikhatu kfiwunomko.



<sup>15</sup>Fitoh yimar kfo kamukr, Jisars Bro Nkifrarhu yoner, nd yimar Bro Nkifrar pno brbo frtkafwor yo nd yimarpno Bro Nkifrar brbo frtkafwor.

<sup>16</sup>Bro Nkifrarhu yuhuwafeft nompno yorhwat htita-nomn duka kangnom Bro Nkifrarhu bro dukefr nompno korhr. Ndnnetnomn nom nhai Bro Nkifrar yafhokahnomr.

Bro Nkifrar tu bro yima yuhuwafeter. Fitoh yimam yima yuhuwafeft korhtm, nd yimam Bro Nkifrar pno frtkafwor yo nd yimampno Bro Nkifrar frtkafwor.

<sup>17</sup>Bro Nkifrar pno inji naftrkafhato tohrahnom, to be nd wom Kristenmpno nayakitohhato rpat tohneft myakitoh bmtaknirahnomt. Inji narahnom, Bro Nkifrarhu bro mrokfo yakitoh yihar nhai duka yanho hanyruhatnom. Nom nda bbinysoft tohwohat Kraistr kanjo tohwonom. Ndnnetn nd yihar nhai duka yanho furaruhatnom.

<sup>18</sup>Yimar wom Kristenmpno nayak marnyahato rpat tohwom, nd yimar nhai Bro Nkifrar yakrmi hanykahrr. To wom yimar nhai wom Kristenmpno nayak marnyahato rpat tohkahm, nd yimar Bro Nkifrar pno mrokfeter. Nd yimar kakrmi hanitrr Bro Nkifrar.

<sup>19</sup>Bro Nkifrar riyak marnyakmotr-nom nom be nd yuhat hikhatto womm kak marnyewunomm.

<sup>20</sup>Fitoh yimar kfo kangr, “Bro Nkifrar be nanhu yuhuwaf marbitn korhr,” ndhtet kfet yimar mirahr be tngrrpat afurat Be tngrrpatn furahato womm nhai yak marnyakahrm, tone finji dukaruharr nd ror hti duha yita Nkifrar? Nhai. Nd yimar kfo furayeter.

<sup>21</sup>Kraistr kfo yuk mrokfot kfo memor, “Fitoh yimar Bro Nkifrar rorhu yuhuwaf marbitn korhr, wom Kristenm yak marnyakfot.”

#### **Kristenroh bbukeftn nda bbinysofthu ufasoh nefroh bbukeft kahot nohwott**

**5** <sup>1</sup>Fitoh fitoh yimam Jisars htihato duka kangm, “Jisars tor nd yimar Bro Nkifrar kfo tkrurafmor. Rorn yimam hbhakrahrm.” Inji dukayet yimam, Bro Nkifrarhu yonm korhm. Fitoh yimam Bro Yifemr hti yindhorwomr, rorhu wom yonm inji hti yindhorwomm.

<sup>2</sup>Bro Nkifrar nmoh yima yuhum htahato rorhu kfo yuk mrokfom hikrahnom, to be nom rorhu yonm htineft nmoh yima yuhum htarahnomm.

<sup>3-4</sup>Nom Bro Nkifrar hti dukarahnom, rorhu kfo yuk mrokfom hikrahnom. Fitoh yimam Bro Nkifrarhu yonm tohwam, nda bbinysofthu ufasoh nefroh bbukeft kahot nohwomt. Nom Bro Nkifrarhu mrokfom yakitohhato hikwanomn nda bbinysofthu nefm yuwa muh thombat kahot nohwonomm. To be nd yuhatn Bro Nkifrar kfo yuk mrokfot nhai mduka nhiyakkahnomt hikneft.

#### **Bro Nkifrar turhu yinemrhu mrokfot kfo ptha hikmort**

<sup>5</sup>Frohmn nda bbinysofthu ufasoh nefm yahot nohwamm? Yimam duka yamukam, Jisars Bro Nkifrarhu yoner, tom nd yimamn nd ufasoh nefroh bbukeft kahot nohwomt.

<sup>6</sup>Jisars htimonomr tu Bro Nkifrarhu yoner. Jonrpno baftais yakmohat htimonomt Bro Nkifrarhu Yafothat nunga momkrs kanjo yohninehato Jisars mifakmot. Yo yura bgre mis nohmohat kkut yohnemot. Nd neff htihato duka kang-nom, tu Bro Nkifrarhu yon mifer. Nd Bro Nkifrarhu Yon mifrrhu rhu yuhata tfit tu Bro Nkifrarhu Yafothatn kak nuhas bugewutnom. Bro Nkifrarhu Yafothat tu kfo yimbu mifwot.

<sup>7</sup>Jisars Bro Nkifrarhu yonrhu ruheft, husfirpa yihotam htitanomn duka kangnom, tu Bro Nkifrarhu yoner.

<sup>8</sup>Bro Nkifrarhu Yafothat yak nuhasmohat, yo Jisars baftaismohat, yo kku bebt harhumohat, nd husfirpa nefm htihato kfo kangnom Jisars tu Bro Nkifrarhu yoner.

<sup>9</sup>Yima mifm pthayuk mrokfom wany nhtahato wom mrokfom kangnom, kfo mif mrokfoyem. Womm kangnom kfo fura kfoyem. Rom yima mifmn pthiwatm ndhtet dukefm kekwonom. To Bro Nkifrar kfoyuk mrokfom nhai ndhtet dukefm yakkfot. Ror kfo memohat Jisars rorhu yoner, ndt kfo mifmort.

<sup>10</sup>Yimar Bro Nkifrarhu yonr yak hikwar, nd yimarn nd Bro Nkifrar kfoyuk mrokfom korhmr rorhu yima yuhur. Yimar nd Bro Nkifrar kfoyuk mrokfom nhai yakitohhato hikkahrm, ndhtet yimar nhai wany yakiokahrm. Kangr, “Bro Nkifrar kfo furewurnom. Jisars nhai turhu yon mifr rhukahr.”

<sup>11</sup>Yimaroh toh nkifraniyuk yihotar Bro Nkifrar bi fak hta bohtamorr. Turhu yonrn yura bgre mis nohhato nd yimam toh nkifraniyuk yihotar fak marnyaktmort. Bro Nkifrar yihotar inji fak hta nuhasmornom.

<sup>12</sup>Yimam nd Bro Nkifrarhu yonrpno frtkafwam, nd yimamn toh nkifraniyuk yafothar kekwoomr. Yimam nhai Bro Nkifrarhu yonrpno frtkafkahr, nd yimam nhai toh nkifraniyuk yafothar yakkahr.

### Toh nkifranirahnom

<sup>13</sup>Niko Bro Nkifrarhu yonr hikwa tuhan yindariko mirahko bok dukefm yakhato kfo amanyom, “Nd toh nki-franiyuk yafothat ka bi hatohwonomt o ka nhai?” Mirahko ndhtet bok dukefm ayaknom. Nd toh nkifraniyuk yafothat bi fakmokomt. Ndar gontwat to ndthu kfo dukayuk gontwatn kahukanko.

<sup>14</sup>Bro Nkifrarhu dukefrn toh hikhato tamohm kfo bruttnarah-nomr, wanukrnom. Ndnnetnomn nhai mduka kinyakiyuk hanykahnom rorhu kfo ttiwonneft.

<sup>15</sup>Nom tamohm kfo bruttna thombat wanyhato kahukrnom. Ndnnetnomn tamohm kfo bruttnaneft kangnom, he mifrahnom. Nhai wany marsisaruharnom.

<sup>16</sup>Wom Kristenm wom fasoh nef bebm mfsuhm, yo be niko womko rhuhato nd yimam Bro Nkifrar pno kfo bruttnakfot. Kfo bruttnahato Bro

Nkifrar tfit yafothat thu hmbrirahrm. Maringou yuhat yak hatohafoyuk nefm mnem, na kfiwa mirahko akfo bruttnanommm.

<sup>17</sup>Fasoh fasoh nefm, fasoh tkit bebm htewumko. Wom nefmn, hel yak hatohaforahmko. Wom nefm, nhai.

<sup>18</sup>Rot htitwonom, yimam, Bro Nkifrarhu yonm yorhwam, nhai fasoh nefm na hanykahm. Nhai. Bro Nkifrarhu yonr tabohifat hmbritatrm Satanr nhai brbo yikahr.

<sup>19</sup>Nmoh toh nmbuhat rot htitwonom Bro Nkifrapno frtkafwonom. To nda bbinysof bugat rot nndo Satanrhu yinhitn korht. Rorhu bbukeftn kakitohwott.

<sup>20</sup>Bro Nkifrarhu yonr, ror bi niamor. Rorn dukefm kahukrnom. Dukefm yahukatrnom hti yimbu hikwonomr tu Bro Nkifrar. Bro Nkifrari rorhu yon Jisas Krairpno frtkafwonom. Jisas Krair tu Bro Nkifrayer. Rorn nd toh nkifraniyuk yafothat thu hmbritrnom.

<sup>21</sup>Bar yonenko, mirahko tahi yifonmpno brbo ainyom.